

謂差強人意去年出口僅一千五百擔今年則增至二十萬石可見新法製煉實有成效可觀論中又謂近年來各省趕鑄銅元原以輔助制錢之不足但恐民間度日久賴制錢銅元以一當十暢行後制錢漸致銷歸烏有民間國計交受其因此亦不可不預防者也又賠款每年數千萬有人謂運出鉅款年復一年深爲可危此特懸揣其理未諳市情之言也中國賠款以現銀付銀號兌取鎊票交與接收之人而商人持票赴銀號兌銀者仍係置辦土貨用於中國境內是以歷屆賠款雖鉅而銀本未見困難又進口貨價約多三分之一說者謂逐年漏卮伊於胡底不知除進出各貨價外尚有進出各隱物可以相抵出口之隱物維何卽出洋華工寄回之資暨各國商人教士在華各行用款以之抵進口貨價所多之數尙覺有盈無絀是以通商有年銀錢進出終未形虧累之狀以上各節皆於貿易總論中言之頗詳此中事理均應熟籌爲要理合申請鑒核可也須至申呈者

福建洋務局移知各局不准洋商在內地開設行棧文

奉前總督部堂魏批汀漳龍道詳石碼長隆華號東謝鍾瓊藉掛洋牌抗繳賈捐一案准德國倫領事照會查辦照約覆請將洋商在漳碼內地設棧懸掛洋牌概令撤去以免華商藉名緣由奉批查洋商不准於內地開設行棧載在約章日本馬關條約雖載有准設存棧之

文亦止許其暫時存貨仍不得就棧私作買賣懸掛洋牌本部堂前因訪聞廈門地方多有華商冒掛洋牌抗繳買捐情事即經檄飭興泉永道督飭廈防廳確查嚴禁在案漳州石碼係屬內地非洋商所得設棧貿易更不容奸商假託洋商經理人名目懸牌抗捐該道按約駁阻所辦甚是仰福建洋務局會同□□局移飭遵照認真查禁繳等因並准汀漳龍道移知各到局奉准此查華商冒掛洋牌抗繳買捐例應嚴拿懲辦以儆效尤且於洋商不得在內地久住開行早載條約若在沿途轉運貨物雖准暫租棧房然祇專爲存貨起見自不能就棧私作買賣以及懸掛洋牌致違條約此外洋商領有稅單入內地賣洋貨事爲條約所准固屬可行但祇能將該貨寄售於華商所設行店之中不得任聽洋商經理人自行懸牌開店即寄售之華商行店亦不得兼掛洋牌以嚴限制而杜混爭至於華商藉名抗繳買捐尤爲情所難恕應聽該管地方官究辦不能輕縱此後凡屬內地店舖如有懸掛洋商牌號均應照約概令撤去不得任其仍前冒混一面報局察核庶彼此各保權限而免時有爭論應再由局引伸道文移行通飭一體遵照認真查禁並照會各國領事轉飭在口各洋商一律遵照庶免冒混而重約章爲此備移貴局請煩查照施行

各省商務彙誌